



PORTAVÓS VI GOVERNUN KONSTITUSIONÁL



KOMUNIKADU BA MEDIA

Dili, Loron 7 fulan-janeiru tinan 2016

Governu serbisu atu jere efeitú sira hosi El Niño

Governu Timor-Leste nian daudaun ne'e serbisu hela atu hamenus impaktu sira hosi fenómenu klimátiku ne'ebé koñesidu ho naran El Niño iha tinan 2015-2016. Ministériu hotu hetan knaar atu kontribui ho sira-nia koñesimentu espesializadu sira iha preparasaun ba resposta koordinada ida, liuhosi avaliasaun ida kona-ba efeitú sira ne'ebé bele mosu ba agrikultura, peska, bee no saúde. Ministru Interiór maka lidera prosesu ne'e no koordena kona-ba tulun husi ekipa umanitária nasional, ne'ebé integra organizmu sira husi Nasoins Unidas, Krús Vermella no NGO sira seluk.

Tempu udan ne'ebé to'o tarde no menus iha fulan hirak ikus ne'e akontese tanba korrente oseánika manas, ne'ebé book an fali ba-iha Amérika, hodi provoka presauñ ár nian la hanesan ne'ebé provoka situausaun ne'ebé daudaun ne'e sente ona iha Timor-Leste. Udan ne'ebé mai tarde no la tuir nia tempu afeta liuliu ba to'os-na'in sira, ne'ebé iha tinan baibain, hahú kuda sira-nia natar no to'os sedu liu.

Ministériu Agrikultura no Peska (MAP) akompañia nafatin padraun meteorolójiku sira, hodi fó hanoín ba to'os-na'in sira husi kedas fulan-outubru, liuhosi informasaun kona-ba forma sira atu hamenus efeitú sira husi udan ne'ebé mai tarde no menus liu, ne'ebé bele haree iha delegasaun munisipál sira MAP nian. Kartás no programa sira rádiu nian uza ona hodi hasa'e to'os-na'in no família sira-nia sensibilidade kona-ba impaktu sira ne'ebé bele mosu, ho rekomendasaun sira kona-ba oinsá halo asaun. Udan ne'ebé tau iha fulan-novembru nia rohan, no nia tau nafatin iha fulan-dezembru, hahú fó laran metin, maibé udan ne'e tau la hanesan iha rejjaun hotu.

Ekipa umanitária nasional halo avaliasaun inisiál ida kona-ba efeitú hosi El Niño no kona-ba sa'ida de'it maka bele sai nu'udar nesidade populasaun nian ne'ebé afetada, atubele kria resposta no rekomendasaun lubun ida apoiu nian ba Governu, ba-iha preparasaun planu resposta nian ida.

Indikadór sira karik bele hatudu katak El Niño tinan 2015-2015 nian atinje ona forsa másimu iha semana hirak ikus ne'e. Temperatura iha oseanu tropikál sira hatudu katak ida ne'e bele sai hanesan El Niño ida hosi El Niño tolu ne'ebé forte liu hosi tinan lima nulu ikus. Modelu klimátiku sira hatudu ba diminuisaun ida husi intensidade fenómenu ne'e nian iha fulan hirak tuirmai, ho posibilidade atu fila-fali ba situausaun normal ida durante trimestre daruak tinan 2016 nian.

Portavós Governu Konstitusionál VI nian, Ministru Estadu Agio Pereira, hateten katak "Governu halo dadaun monitorizasaun ida kle'an ba efeitú sira husi "El Niño" no halo hela serbisu atu tulun to'os-na'in sira no



Agio Pereira
+670 7723 0011
agio.pereira@cdm.gov.tl
govtlmedia@gmail.com
www.timor-leste.gov.tl

populasaun einjerál ba-iha jestaun fenómenu ida ne'e. Esforsu atu halo kolaborasaun husi ministériu hotu no ekipa umanitária nasional, ne'ebé koordena husi Ministériu Interiór, importante tebe-tebes hodi rezolve loloos impaktu sira ne'ebé afeta ita, no mós ba ita-nia viziñu sira iha Pasífiku, iha fulan hirak tuirmai".

REMATA

